

CXXIV

1373-XI-27, Toro.—Provisión real al concejo de Murcia, concediéndole que no paguen alcabalas de los tintes para los paños. (A. M. M. Carta real 1405-18, eras, fols. 72r.-72v.)

Don Enrique, por la gracia de Dios rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe, de Algezira e sennor de Molina, al conçeio e ofiçiales e ommes buenos de la noble çibdat de Murçia, salud e gracia.

Sepades que viemos vuestras peticiones que nos enbiastes, et a lo que nos enbiastes dezir que en tienpo del rey don Alfonso nuestro padre, que Dios perdone, para que esa çibdat fuese mas ennobleçida e rica que le enbiastes pedir merçed porque se pudiese y fazer pannos e tintes e los ommes ouiesen talante de traher y lanas e tintas para ello que non pagasen dellas derecho ninguno, et que el por vos fazer merçed que vos lo otorgo e vos mando dar su carta en esta razon et por esto que se fizieron y algunos pannos en los tienpos pasados, et nos que vos lo confirmamos e mandamos guardar, et agora que los arrendadores que demandan alcauala del tennir de los pannos pues non es sconprar nin vender, saluo que se alquilan los tinteros por çierta quantia de maravedis para tennir los pannos et que non son tenudos los tintoreros nin los que tinnen las tintas de pagar alcauala, et que nos pediades por merçed que mandasemos que non pagase alcauala del tennir de los pannos pues non es conprar nin vender quanto mas que se paga despues quando se vende el panno tinto.

Sabed que sobresto nos tenemos por bien que de la tinta que se compra e vende en gros para tennir los dichos pannos que no se pague alcauala ninguna de los jornales que les dan por ello, et por esta nuestra carta mandamos a los arrendadores e cojedores de las alcaualas de esa çibdat que agora son o seran de aqui adelante e a qualquier dellos, que non demanden la dicha alcauala del tennir de los dichos pannos que tinnen los dichos tintoreros nin de los jornales que prendan por los tennir, saluo de la tinta que se venden e compra en gros para los tennir commo dicho es. Et non fagades ende al por ninguna manera so pena de la nuestra merçed.

Dada en Toro, veinte e siete días de nouienbre, era de mill e quatroçiesno e honze annos. Nos el rey.

